



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Consolator Fidelis Et Proficientis Animæ seu
Exhortatiunculæ Spirituales Et Succinctæ In singulas
Dominicas & Festa anni divisæ, quibûs Confessarius in S.
tribunali animam Deum verè quærentem paternè ...**

Eisvogel, Veremund

Augustae Vindelic., 1727

14. Exaltatio S. Crucis

[urn:nbn:de:hbz:466:1-52716](https://nbn-resolving.org/urn:nbn:de:hbz:466:1-52716)

Festum Exaltatæ S. Crucis.

EXHORTATIUNCULA I.

Fili! Amice! magni esse cupimus? Cupimus inter creaturas exaltari? Vitæ incommodis, paupertati, aliisque ærumnis imperare? Amplectamur S. Crucem, quam nostris imposuit humeris providus, misericors Deus. In Cruce miseria nulla. Sine ea semper maxima. Qui hîc flagellatur, ibi perpetuò lætatur. Abite jam momentanea hominum & sæculariter viventium gaudia! Abite! sum, ubi Crucifixus.

Instructio meritoria.

Adoremus nobile S. Crucis trophæum, & ut omni veneratione in orbe universo à piis Christianis honoretur, statim à manè, & primo excitationis signo versus quatuor mundi plagas genua flectamus dicentes: *Adoramus te Christe, & benedicimus tibi, quia per Crucem tuam redemisti mundum.* Recitemus & Hymnum ex Vesperis: *Vexilla Regis prodeunt.*

II.

Heraclius Imperator ovans & triumphans ad proprium locum suis humeris sacram Crucem à Chosroa reportatam portare gestiebat. At urbem ingredi non potuit. Prius purpuram, coronam, & calceamenta deponere debuit. Humilitas in servis placet cœlorum Regi. Et hæc virtus nunquid & nobis possibilis? Humilitate quid ditius? Quid pretiosius? Hac regnum cœlorum emitur. S. Bern.

Instructio meritoria.

Superbiunt non rarò & nostra capita! Ideò non mirum, quòd nondum in nobis transformatus sit Christus, & hic Crucifixus. Ut nos tandem humiliemus, nostrasque voluntates submittamus, omnes preces, adorationes Venerabilis Sacramenti, vel alias devotiones in Ecclesia inclinatio exemplariter versùs terram capite, ac submissis oculis instituamus oraturi pro opportuniore occasione officium minus de S. Cruce. Jesus pendet in Cruce! Et homo incedat elata cervice?

III.

CHare! ad Calvariæ montem ascendere cupimus? Nudis pedibus, & pœnitentiæ operibus eò eluctemur, uti Heraclius. Cum Cruce Domini non stant affectus pravi, passionēs, aut turbidæ propensionēs. Nudi simus, necesse est, si divitias, & gloriam Jesu rapere & capere desideremus. O beatos pauperes spiritu! *Quanta enim beatitudo! pro parvis magna recipere, aterna pro brevibus, pro morituris semper viventia, & habere Deum debitorem?* S. Hier.

Instructio meritoria.

Dicamus igitur cum D. Paulo: Mihi autem absit gloriari nisi in Cruce, in paupertate, humilitate, & obedientia Domini Nostri Jesu Christi! Quibus virtutibus ut ad cœlum usque tertium exaltemur, per octo dies quotidie coram Crucifixo genuflectamus, & *quinque Patres & Ave*, in honorem quinque SS. Stigmatum Jesu recitemus. Cum Jesu! cum Cruce Domini! cœtera nihil ad nos.